

Spørsmål frå Alexander Fosse Andersen (Sp) om skuleskyss frå Indre Masfjorden:

Senterpartiet har vorte kjent med at elevar frå Indre Masfjorden som går på Knarvik vgs har eit skuleskyssstilbod som medfører lang ventetid både før og etter skulen. Tilhøva har vorte forverra dette skuleåret på grunn av endra skulestart ved Knarvik vidaregåande og at ekspressbussen har lagt ned ei rute. På ei veke har somme elevar på det meste 12 timar med rein ventetid før og etter skulen. Det vert òg opplyst at elevane i liten grad har hatt høve til å opphalde seg på skulen i ventetida før og etter skuledagen.

Knarvik vidaregåande er nærskulen til elevar frå Indre Masfjorden. Senterpartiet ynskjer at flest mogleg skal ha høve til å bu heime medan dei tek vidaregåande utdanning. Med så lang reiseveg og lang ventetid er det lett å sjå føre seg at elevar kan måtte flytte på hybel mot deira vilje. Det er ei utvikling Senterpartiet ikkje ynskjer.

Senterpartiet har difor desse spørsmåla til opplæringsdirektøren:

1. Kva kontakt har fylkeskommunen hatt med Masfjorden kommune, føresette og Knarvik vgs. om skuleskyss-situasjonen for elevar frå Indre Masfjorden?
2. Korleis organiserer ein skuleskyss der det er lang reiseveg og rutebusstilbodet medfører lang ventetid?

Svar på spørsmål frå Alexander Fosse Andersen vedk. skuleskyss Indre Masfjorden

Fylkesrådmannen viser til følgjande spørsmål frå Alexander Fosse Andersen i samband med skuleskyss for elevar frå Indre Masfjorden:

1. «Kva kontakt har fylkeskommunen hatt med Masfjorden kommune, føresette og Knarvik vgs. om skuleskyss-situasjonen for elevar frå Indre Masfjorden?
2. Korleis organiserer ein skuleskyss der det er lang reiseveg og rutebusstilbodet medfører lang ventetid?»

Det har gjennom dei to siste skuleåra vore kontakt mellom Hordaland fylkeskommune v/Skyss, føresette og Knarvik vgs. Elevane frå Ytre Masfjorden nyttar rutebuss til og frå skulen. Om morgonen fungerer dette greitt og elevane kjem til skulen i passe tid. Om ettermiddagen nyttar elevane Norway expressbuss. Det er lang ventetid frå skulen er slutt og til bussen går. Elevane har tilbod om å vente på skulen.

Knarvik vgs er ein stor skule med neste 1000 elevar frå heile Nordhordland og nordre Åsane. Skulen har jobba med å tilpasse skuledagen og finn at tida for start og slutt på skuledagen no er best mogleg.

Dan Femoen (H) sette fram følgjande bestilling på vegner av H, FrP, V, MDG, KrF, SP, A, SV og R:

«Ber om at det i samband med fylkessamanslåinga vert vurdert om det skal vere ei øvre grense for ventetid i fylkeskommunen sitt skyssreglement, samstundes som det vert tatt omsyn til at ein rasjonell organisering av skyssen vert ivaretatt.

Utval for opplæring og helse viser til innspel som har kome frå Masfjorden kommune ved ordførar og ber om a dette vert svara på i ei eiga sak.»